



আমার স্মৃতির খাতা

- ইউকা ওকুদা



গুরুদেব রবীন্দ্রনাথের দেড়শোতম জন্মজয়ন্তী উপলক্ষে আমার শান্তিনিকেতনের স্মৃতি নিয়ে কিছু লেখার সুযোগ দিয়েছেন অঞ্জলির সম্পাদক। আন্তরিক ধন্যবাদ ও প্রণাম জানিয়ে স্মৃতির পাতা খুলছি।

বিশ্বভারতীর ছাত্রী-জীবন শেষ করে দেশে ফিরে আসার পর কেটে গিয়েছে অনেকগুলো দিন, তবু নির্দিধায় বলতে পারি শান্তিনিকেতন এখনও রয়েছে আমার মন-প্রাণ জুড়ে।

ওই যে আমার চোখে ভাসছে একটি মেয়ে, নীল রঙের শাড়ী পরে, ডান হাতে ছাতা খুলে ধরে, সাইকেল চালিয়ে যাচ্ছে -- সেই “আমি”। সম্ভবত সঙ্গীত-ভবনের ক্লাশে যাচ্ছে সে।

সঙ্গীত ভবনের মেয়েদের শাড়ী পরাটা যেন প্রতীকের মত। তবে কোনো নিয়মে বাঁধা নয়, যেন স্বাভাবিক ভাবে মিশে আছে সুরের লহরিতে। পাশে কলা-ভবনের শিল্পীরা কামিজ পরে তাঁদের হাতে গড়া সৃষ্টির সাথে যেমন ভাবে মিশে থাকেন, ঠিক তেমনই। শান্তিনিকেতনের মেয়েদের মৌলিক শক্তি সেই যে মাটির রঙ আর হাওয়ার সুরের মধ্যে থেকে এসে যায় বুঝি। জীবন সুন্দর, সুন্দর জীবন -- এই প্রেরণা পেয়েছি গুরুদেবের ভালবাসায়।

নতুন তোলা গুরুদেবের গান, গুন-গুন করে গাইতে গাইতে গরম হাওয়ায় উড়িয়ে দিয়ে ফেরার পথে কি যে আনন্দ -- আঁচলের নাচন!



আমি তো বাঙালী নই! তাতে কি আছে? গুরুদেবের গানে তো মন ভরপুর! এই গান আমাকে ধরিয়ে দিয়েছিলেন মোহর দি,

অর্থাৎ শ্রীমতী কণিকা বন্দ্যোপাধ্যায়। সুরের কাঠামো শুধু নয়, তিনি দেখিয়ে দিয়েছিলেন গানের ভিতর যে আনন্দ ধারা বইছে, সেই ছবিও।

আম্রকুঞ্জে চাঁদের আলপনা, ছাতিম তলায় ধূপের রেখা, পলাশ ফুলে গাঁথা হাসির মালা, ঘন মেঘের বৃষ্টি ভেজা মাটির গন্ধ -- এই সব কিছু যে এক দিন আমার গান শুনেছিল তা ঠিক!

গোধূলিবেলার তীরে মোমবাতির আলোয় বসে শুরু করি রেওয়াজ। সা-রে- গা-মা----র প্রতিটি সুরে যাঁরা রয়েছেন, তাঁদের ছায়া খুঁজি। মনে হয় যেন পৃথিবীতে কোন অভাব নেই, আছে শুধু শান্তি, পূর্ণ শান্তি। খুঁজতে কোথাও যেতে হবে না, মনের মধ্যে আছে মন্দির, সাধনার পথে এগিয়ে গেলে কোনদিন হয়তো দেখা হতেও পারে। হাতে কিছু নেই, তবু সব আছে। পরমানন্দের আলোর পথ, মুক্ত আকাশ, মন চায় সে দিক দিয়ে যেতে।

আমি তোমায় যত শুনিয়েছিলাম গান

তার বদলে আমি চাই নে কোনো দান।

ভুলবে সে গান যদি, না হয় যেয়ো ভুলে

উঠবে যখন তারা সন্ধ্যাসাগর কূলে,

তোমার সভায় যবে করব অবসান

এই ক’দিনের শুধু এই কটি মোর তান।

তোমার গান যে কত শুনিয়েছিল মোরে

সেই কথাটি তুমি ভুলবে কেমন করে?

সেই কথাটি, কবি, পড়বে তোমার মনে

বর্ষামুখর রাতে, ফাগুন-সমীরণে --

এইটুকু মোর শুধু রইল অভিমান

ভুলতে সে কি পার ভুলিয়েছ মোর প্রাণ ॥

রবীন্দ্রনাথ ঠাকুর।

শান্তিনিকেতনের স্মৃতির খাতায় দেখি সবাই হাসিমুখে হাত নাড়ছে। আমার এই খাতা কোনো দিন মিলিয়ে যাবে না। অন্তরের ভালবাসার জনকে আজ নতুন করে পাব বলে মনের কোণে শঙ্খ ওঠে বেজে। □